





豐正元先生詩卷之三

七言律

西湖暮歸

湖上徒倚忘歸去  
水靜蓮香度夕暉  
三竺梵鐘雲外杳  
六橋漁火望中微  
蕭蕭翠栢錢家墓  
渺渺滄江巖子磯  
却憶春游醉吹笛  
九衢紅雪杏花飛

呂程

寂寂旗亭呂水隈  
蕭然艤棹憶重來  
踈踈柳葉客中



*[Faint vertical text, likely bleed-through from the reverse side of the page]*

畫渺渺寒江風外起雲岫上游分暮色露蟬深樹動  
秋哀片帆明日姑蘇道又過吳王歌舞臺

入龍江關尋慧上人

寒蘆洲傍石頭城百里龍關一日程雲葉半江翻鷺  
鷗浪花雙棹引鷓鴣中峰王氣春常紫南苑梅香晚  
自清却笑茂陵多病客閒尋惠遠話無生

綠蘿菴無錫王仲山菴

春屐尋幽入化城東風草閣坐聞鶯煙蘿隨意綠千  
尺水竹無塵翠一泓飛電已從形外悟降龍休向鉢  
中鳴自憐踈放慵聽法一笑還甘漉酒名

至石磬莊

一逕湖心通翠微入山先自着山衣繞籬野荳花爭  
放背日曬枝葉半稀漁散空洲秋水在煙橫高岫夕  
禽歸閒居最得無能味白石蒼蒼是釣磯

山曉

山館幽扉生曙光曉風殘月共蒼蒼角巾自攬煙霞

色空逕時飄蘭蕙香日射女垣啼宿鳥露翻桐葉墜  
秋岡三山極目青旌指一片閒雲似水涼

山晚

西嶺蒼蒼月又明空齋高掩白雲層山中都忘年華  
晚身外何營鹿豕情窈窕群峰低黛黛參差喬木動  
秋聲不須更擬閒居賦且盡清尊泛落英

上候濤山

諸峰迢遞擁江門此日登臨一舉尊萬里滄波縣白  
日孤城芳樹帶春雲風開員嶠煙霞近日極瀛涯島  
嶼分誰念葉田千載事人間擾擾易朝昏

再上候濤山

縈迴磴道出青葱絕頂重登四望通山色遙連滄海  
外濤聲長卷白雲中漢家青鳥飛迴少方朔仙桃竊  
後空洛浦聖恩脩繕早金支香度翠濤風

送翁存裕赴試北雍

東風楊柳綠毵毵欲縮長條思不堪驛路晚晴鶯自

轉越江春漲水如監孤雲海上勞歸夢片月花前引  
去驟知爾其泉能獻賦無云狂客臥江潭

前林暮歸

水禽戛戛歸飛急一縷輕煙靄悞姿孤村漁舍多黃  
葉平楚踈篁有舊碑廟下秋花隨點綴江頭雲嶠映  
透迤百年轉眼俱陳迹浪把瓊簫學鳳吹

孤城秋色

孤城景物自透迤百里空江睥睨遲靄靄蒼蒼秋水  
候風風雨雨暮潮時澄潭倒拂芙蓉棹遠樹斜連薜  
荔祠何處高樓亂愁思數聲長笛動相伊

江上

蒹葭水國正蒼然漢節新廻下瀨船野寺昏鐘鳴度  
水長堤秋樹遠浮天關門濁浪旌竿濕江閣踈簾睥  
睨縣見說 至尊憂國計盡銷金甲息狼煙

哭屠司馬舅祖

大星颯颯奔西垂病裏潛然誦楚詞朱紱三朝生自

貴玄書一卷死堪遺花開故第青春異燕繞空屋簾白  
日垂可是羊曇揮策去西州城外酒醒時

平生

平生名嶽尋真意黃帽青鞋幾度思遂有兒曹尚子  
累翻成耕稼鹿門期山蟬忽變園禽響汀樹長添海  
月枝自笑浮漚成底事擬拋身世待何時

范莊與李賓父訪主人不值

幽徑分林帶碧蘿范莊喬木拂雲多溪邊倚杖梅初  
放竹裏尋扉客自過鳥蹟閒塘寒雪暗佛香隣炊晚  
煙和憐君酒態顛狂甚擬共春晴一放歌

早秋同楊伯翼舒子開過沈嘉則明月榭豐對樓

相携狂客此登樓海內才名今白頭明月自臨飛榭  
出青天長抱曲闌浮幽栖獨釣芙蓉水高調誰分叢  
桂秋白杜山低江樹斷滄溟只在檻中流  
茂陵歸臥興何都豐對樓成壓海隅闌外千花明寶

樹梁間雙燕拂流蘇山橫雲氣通疎牖水滂秋光下  
碧蕪漢鼎商彝奇絕甚不妨五嶽配新圖

春盡憶伯翼賓父

柳梢花萼晝風微春盡繁紅尚未稀翠藻滂舒紅縷  
細白鷗閒泛渚潮迴門前喬木連雲繞海上諸山接  
浪飛深逕所嗟侵茂草求羊早已謝幽扉

立夏日偶作

清江綠樹抱晴暉傍服春風早自歸小徑新篁穿石  
磴空洲繁荇上漁磯卽看花影飛紅合又見蘿陰轉  
翠圍自洗雲舟酒船開宿醞藥欄西畔月輝輝

除夕

小樓深坐翠微中又見芳春換朔風荏苒一年今又  
盡蕭疎雙鬢早時同眼空浮世三千劫足濯滄浪七  
十翁一片紅雲何處至鳳簫仙樂海門峰

元日

東風拂拂草芊芊元日陰陰淑景偏林下竹聲如鳳

豐正元分全詩 卷三 六  
吹湖中山色似龍騫芳尊自可酬新歲衰鬢應能更  
少年寂寂閉門方謝客援毫漫賦白雲篇

三日

芳春三日雨霏微多病愁心上釣磯  
簷響細聽金雀亂爐香雙裊翠鸞飛  
匡牀錦石支高臥虛館細簾憶  
舊扉林外長天生暮色白雲西望萬峰迴

九日獨酌有懷已故二三知己

浦把西風已暮秋蕭然扶病一登樓  
長林遠共群峰接小檻平臨大海流  
黃菊自憐衰後興煙霞亦是水中漚  
援毫忽湧成惆悵懷舊吟成就與儔

與友人舟汎

乳禽啼徧露桃枝春盡蘭舟湧自移  
修竹每從延野眺茂林還與赴幽期  
江飛雁鷺丹霞映棹拂芙蓉綠  
水遲多病未須嗟縱飲白頭不似少年時

雪

春江渺渺思遲遲春雪簫簫晚霽時  
銀漢有雲皆玉



豐山先生詩 卷三 七  
葉瑤臺無樹不瓊枝詩成梁苑人初醉書到瀟湘雁  
不知清絕小樓中夜月梅花無數影垂垂

早春

乳鶯初囀柳初柔花霧林香一倚樓風外遊絲連軟  
蝶苑中芳樹近簾鈞天青晚岫依屏列水綠春江學  
字流踈嬾不堪連日醉牕間殘局客來收

午日有懷亡友賓父伯翼

嵐蒸五月恒難霽照眼榴花湧欲燃江盛更添連火  
雨風涼還似早秋天玉蒲金黍隨風俗白髮清尊閱  
歲年屈指故人如昨日愁聞黃鳥自翩翩

登宋御校場次鄭少谷韻

天風海日迥蒼蒼絕頂猶傳內校場萬旛旌旗江樹  
裏兩宮涕淚塞雲傍朱仙將死傾黃屋偃月堂成覆  
御牀地下君臣相見否千秋南雁恨空長

徽廟有日  
斷天南少

雁飛之句

又上候濤山

江流淼淼樹森森列岫連雲海氣深  
萬里天風吹客袂三春旌旆入邊  
吟滄波光泛青霄動琪蕊香生碧  
殿陰仙苑瑤臺何處所魚關狼戾  
晚沉沉

夢遊

夢與二三所知擬遊廬霍卽檢點就道因作別  
家詩得峰迴一聯覺而足成之

暫拂荷衣下碧蘿遠遊名嶽興如何峰迴夕磴留殘  
照江送春帆湧漫波湖海連天流水去煙霞隨地曳  
筇過匡廬衝霍生秋色會接清尊一放歌

子陵釣臺

羊裘男子去仍還片石荒磯天地間三詔頻煩徵故  
友一竿裊娜弄潺湲高風長洒寒江淨漢代空留夕  
照閒眼底雲臺何足問客星今遠紫薇垣

江行

楓葉蘆花霽景偏浪痕沙影夕陽懸蕭條碧水秋堪  
賦空濶滄洲醉未還片月斲飛江樹裏孤舟閒泛海

雲邊芳籬翠芷無窮思一倍幽情惜歲年

補陀山次屠緯真韻八首

翠濤白日晃天中寶刹珠林湧梵宮萬里冷風吹漲  
海六時花雨蔽遙空黃金繩界鯨波靜紫竹叢分齒  
昔紅借問世音何所異經云梵音海潮音勝彼世間音故云須彌芥子  
揔相通

陰陰洞壑水淙淙何限潮音入短筇海濤華夷雲葉  
淨門開日月浪華春金獅自悟無生理香象曾參不

二宗萬國微茫欄檻外天風窈窈散晨鐘

青翠峰奇碧海寬蓬萊指頤接林巒梅檀飛霧香風  
轉龍象浮空浪影殘禮佛金童花數瓣聽潮野衲日  
三竿宰官帝釋皆玄應縹緲祥雲覆巨湍

不辨三山與十洲滄波萬里一浮漚直愁星近青天  
合轉覺雲深大地浮楊柳幾枝搖法雨曇花無數照  
瓊樓盃中半勺神靈水五月清涼海盡秋

海霧如綃晝亦冥凌波孤嶼轉青青一天慧日開金

殿百道祥煙起淨瓶寶筏編超三世業慈航都載普  
門經上方臺殿青蓮合降盡魚龍海不腥

春深綠淨浪茫茫風送緇衣度海航白日雲龍飛繡  
壁青霄星月動瑠梁紫標黃帽皆僧施風爐冰丸悉  
異香中使年年修繕早琳宮燁燁是西方

空濛緝宇浪千尋窈窕龍宮選佛林雲盡天空惟有  
月潮迴風定悄無音蛟人綃剪朝霞麗龍女珠懸寶  
鏡深度盡恒沙多劫苦尋聲無處不悲心

扁舟寒浪一僧歸瑤草琪花自不稀雲片蕭蕭疑掛  
席天光晶晶欲流衣悟來滄海如杯大覺後金蓮與  
世違寂靜聲聞俱未徹禪機忘却是真機

午日與客

江雨冥冥江鳥遲江榴初放照新枝煙青小渚舟橫  
處草綠空庭客到時高調不妨流水奏閒心長與白  
雲期清尊華髮仍餘興隨韻分題更賦詩

豐正元先生遺稿

五言絕句

送友人之京

老向燕臺去迢遙何日歸帝京塵自好莫換薜蘿衣  
不寐

曙斗低江色漁歌起比鄰夜涼元不寐非復爲庚辛

秋園感興四首

廿載飄零客扁舟夢故園那知今夜月獨照昔時尊

其二

水靜魚龍夜園深艸樹秋空拋雙蛺蝶猶有片心留

其三

祇是清秋病園秋涼露多百年雙醉眼看盡暮禽過

其四

明月憑誰問天青夜景斜醉來無一語石上坐霜華

秋園漫興

寂寂閒園裏藤高却倒垂雙雙秋蛺蝶知不怕風吹

其二

草色通林暗蟬聲出樹遲白雲飛不去似愛小茅茨

其三

月白芙蓉開水禽聲啜喋長疑飛雨來秋在琅玕葉

其四

環洲流水碧喬木拂天青誰贈醉眠石秋風吹不醒

其五

雲白秋如水天青夜有霜玲瓏踈樹底片月上空江

芒鞋

水至亭西合山從舍北分芒鞋消幾兩秬爲踏寒雲

豐正元先生詩稿卷之四

七言絕句

春日西湖

杏艷桃嬌雨乍晴放舟湖上聽新鶯重來兼恐花飛  
盡遮莫高樓醉未醒

送李二

十年交態十年狂十日空齋倒酒缸惆悵江頭何以  
別柳條風拂稚鴛黃

村園

長川煙樹幾行斜  
風景蒼蒼近  
看耶多病不知春  
又晚村園落盡米囊花

春日懷吳興陸少塘王無夢

青門煙柳綠絲絲  
醉裏狂歌記昔時  
衰病陸機今在

否山礬花發重相思  
陸庭多山礬

王家宅子青塘上  
門對長溪水自流  
幾度溪頭同瀾

醉棟花應似昔年秋  
王有棟花風雨似深秋之句

湖山曲

曲曲湖山曲曲奇  
芙蓉千朵插玻璃  
峯頭月出雲生

小水百風迴雨到遲

野雉飛飛只籠頭  
閒情一片大湖流  
山松葉密原無

夏水蓼花開不待秋

青天四繞四垂天  
天景波光片月懸  
寂寂小樓常醉

臥洞門流水落花邊

幾家流水幾家山  
鷄犬柴扉白日閒  
但恐雨餘新漲



溢桃花浮出向人間

十年

十年回首幾風塵今日閒園醉裏身一片輕鷗斜日晚前溪流水過西津

春日陳生過草堂話老父舊蹤相對掩泣

廿年飄泊憶親顏吳楚扁舟夢舊山今日郊園零落後空庭客淚共沈瀾

秋日諸公見過西郊草堂却寄三首

余君房

葭菼蒼蒼水徑斜  
滂勞仙客駐靈槎  
武陵秋色尊前滿  
未識于今是晉家

屠田叔舅

東山山色滿城頭  
忽過茅齋又暮秋  
寂寂半曇方臥病  
飛鶴還憶少年遊

李賓父

柴門秋色自蕭條  
愧爾携尊方寂寥  
不是子猷饒野

興平湖落日轉輕橈

江上

江籬寂寂曉風寒江上空洲興未闌一片輕鷗飛復  
下帶將雙棹過前灘

夢裏

夢裏題詩醒却忘醉眠閒憶十年狂東風二月林鶯  
滿自起開扉移石牀

老樹

百年老樹倚柴門樵逕蒼蒼野色分醉向溪頭臥明  
月葉聲風細夜還聞

沙頭

沙頭明月迥紛紛漁艇翩翩過白雲忽憶醉眠清夢  
裏桃源猶有晉時人

夢父

傷心十載江湖事夢裏猶然待遠遊愁倚孤舟幾長  
嘯醉彈雙劍獨登樓

憶毘陵

毘陵閒憶舊曾遊古寺門臨水驛樓浩蕩征帆中夜  
月婆娑銀杏百年秋

夢

蕭條白日總成閒何限門前百越山昨夜雨餘秋夢  
覺五陵朋舊尚朱顏

見梅花懷張前翁

憶別孤城各惘然河橋重上錦書箋  
卽今悵望空江

里時誦瑤華十二篇

曇陽仙昇詩四首

瑤樓縹緲集靈臺大士親從說法來  
此日上昇天外去琳宮都是向西開

還丹早就道機微三歎人間萬事非  
去日不將雙鳳鳥九霄風露拂銖衣

雲車風馭莽叅差阿母凌虛引翠旗  
禮罷群真何所事四花無數照瓊枝

香雲繚繞翠濤翻新上仙娥第幾班飛步瑤天三萬  
里行宮直下是崑山

李氏自鉏園見蝶

五月空江亂出雲踈風細雨一沾巾閒花祇解垂垂  
發蛺蝶飛來不似春

有年二首

水田高下盡穰穰香稻醅成白玉漿爛醉老農遙祝  
聖九旂龍旆五雲鄉

秋社楓木着處同桑麻雞犬屬年豐芒鞋老去渾何  
事踏遍青山一萬峰

登西城

孤城西抱大江斜海上橋成接晚霞狂醉登陴閒縱  
目兩行煙樹萬人家

塞下曲十首

塞下曲古今多矣類皆叙征戰之勞憫邊塞之  
苦雖風世規時不爲無補而憂愁却畏甚非所

以昭聖武而光中國也輒及其意漫裁十絕雖  
詞不逮于古人而體則正於今日敢貽作者一  
笑

十載胡塵暗鐵衣封侯秬事傍金微馬啼自熟陰山  
道玉塞沙中首帶肥

黃雲衰草迥連空青海西頭近白龍廟筭由來弘北  
代敢云 聖主三軍邊功

太白光茫海霧銷曾經匹馬破天驕麟臺已畫 君  
思重玉帳春寒賜錦貂

漠北秋深殺氣孤朝傳白羽破東胡天威合有堂堂  
陣却笑和戎漢策迂

沙磧蕭蕭塞草黃天山八月早飛霜左賢遠遁狼煙  
靜一道金河下大荒

大燾風寒白日昏分催飛將出樓煩安邊不數嫖姚  
革微蹟休將報 至尊

貔貅百萬夜家家羌笛聲中漢月遙許國寧言家萬

里玉關少婦夢空饒

弓開明月抱烏號十下榆關九度遼萬帳降王今款  
塞那緣天馬出蒲梢

勒銘燕然僅廿秋壯年勲業滿邊州老臣猶抱鞬鈴  
策夜按營田自唱籌

萬里龍沙立漢旌拂雲祠外絕胡兵軍中無事夜搥  
鼓塞曲新翻頌太平

七夕三首

雙星窈窕渡銀河經歲離情此夜多桂樹飛香秋萬  
里碧霄空自妬姮娥

采雲銷盡夜沉沉歲歲佳期天漢濤何事昭陽殿西  
月秋來偏照玉塔深

雲鬢綽約擁頰霞銀漢無聲夜景斜怪底天孫容易  
別年年長此度靈槎

李賓父過宿林中談往事有感得流字

落日寒林喜客留孤燈中夜十年愁怪來風雨鳴雙

劍滄海潮通易水流

思仙謠

白日沉沉海氣寒千峯西走抱江干夜來一枕游仙  
夢飛上蓬萊第幾山

萬木簫簫野水隈空林片月轉清輝誰將法曲傳龍  
笛碧海冷風一鶴來

過李賓父自鉏園談事有感

石畦蒼逕春雲流說劍空齋客自留山水卽從江上

出輒坤都是酒中愁

秋日端居有懷諸公

大司馬張沙翁

傷心太傅平生意檢束酬知一惘然昨日秋風經短  
棹嘯臺東去草芊芊

冲宇顏先生

龍山講席大江開簪笏當年濟主才諫草卽今畱御  
榻杏壇童冠幾人來

李賓父

李生詩思極飛翻中歲沉冥獨灌園白眼更憐諸世  
事衡門今日道堪尊

屠田叔舅

秋初一病自春殘別墅登臨憶謝安莫道空洲失雙  
鯉滄江潮上水漫漫

沈勾章

休文江海仍移棹雲褐綸巾看處春幾度相思勞問  
訊滄江秋水獨垂綸

屠赤水

青浦秋山秋色深當年隻字重南金柴門未識神明  
宰愧爾先傳白雪吟

張之杲

水樓高燕十年餘回首風塵自索居爲問臨中舊狂  
令瑤琴何日奏相如

楊伯翼



文章突奧竟誰師太乙青藜字字奇得失寸心千古  
事前林樵辯繫人思

蔡子行

看山臨水與何窮日日濠梁憶爾同城郭傍人成底  
事千林霜色傲秋風

吳興二酒人陸少塘王無夢

陸機髭白颺微風酒後頰欺雙樹紅秋色似憐人不  
見一溪疎雨濕芙蓉

王生爛醉自無愁蒼弁年華寄水流別後遙傳移宅  
去五湖煙浪畏逢秋

金沙虞崦西

虞公避世誰與儔逕竹蒼蒼下海鷗萬卷圖書一尊  
酒年來飛夢度卅丘

龜城張前江

老年詩思薄中州秋色淮南獨倚樓今日風流零落  
盡後庭猶自解藏鉤

太湖鄭石南

大湖獨舸暝光開此日秋風大壑哀憶昔青溪同聽  
雨泠泠天日水東迴

桂北海

孤舟相訪幾年餘回首淮陽歎索居屈指鄴中名獨  
在蕭條作吏近何如

湖山

青山湖上一徘徊多病高秋偶自來一片殷紅霜後  
葉始知春在白雲隈

茨菇

茨菇葉落野塘空草色蒼茫夕照中莫笑東籬霜后  
菊數枝猶自傲西風

汀洲夜望

汀洲極望白雲寒一曲滄江山外山借問秋光何處  
滿竹林明月轉闌干

嘲皇甫

昨讀左太冲三都賦已爲一詩予蓋深有所不  
滿焉乃今覽皇甫玄晏之序而又過之嗟乎玄  
晏高蹈世所瞻仰亦爲是言耶其間稱述文體  
知本之風雅而卑乎淫放猶庶幾作者之旨至  
其隨盛衰而著清濁因強弱而語優劣逆順倒  
置偏正相反談何容易將謂百代之下人心不  
復爾耶茲文也塵德多矣因賦一絕以追嘲之  
銅臺寂莫望陵初春色漳河思有餘終古奸雄多潛

竊秋風滿架是何書

瑤池小宴圖

蓬萊宮殿倚天開鳳管龍旂空翠來一片白雲流不  
散三千仙女御風迴

參差碧岫俯氤氳絳節雙垂若木分青鳥不隨朱鳳  
轉金銀臺上鎖春雲

阿母瑤池樂未央婆娑桃樹撲人香玉闌干外縣明  
月倒映青天一片霜

鰲柱鸞笙度月華海光無數走金蛇不知春色千年  
樹併作瓊臺一夜花

山中見梅花懷楊伯翼

臘盡東風已自吹獨行山逕雪晴時梅花滿地飄明  
月踏遍寒香空所思

病起泛舟四首

病後行吟興復長扁舟載酒下滄浪獨憐窈窕西洲  
曲秋水芙蓉澹夕陽

汀洲新雨足滄波蓮葉菱花已自多無數幽香風勿  
動一聲清唱越溪歌

鷓鴣溪効喜新晴日日沙頭眼自明怪底主人如作  
客秋風雙鬢獨含情

前峰一片落洲陰黛色波光秋向深何用別翻流  
調滿堤黃菊寄幽吟

吹笛

空林醉臥不知秋手采芙蓉下小舟明月滿夫涼似

水閒吹短笛過滄洲

送李子同之江右訪余明府

名山佳水大江西千里蘭舟漫自移君到西昌春正  
煖煙花滿縣聽鶯啼

獨憐臘月早逢春別爾離亭却悵神無端最恨垂垂  
柳祗向江頭解送人

覽屠田叔舅蔡子行薊門廢草

薊門廢草一何新鄴下才名復幾人憂國望鄉俱涕  
淚相思萬里各風塵

夢二首

蕭蕭風雨五更殘支枕沉吟夢又闌最恨今宵無限  
思廿年併入曉鐘寒

風生花影露生香翠篠紅蕖入夢涼借問西湖湖上  
月春來金縷爲誰長

十六夜憶內

月轉空庭與晝同雙燈閒自照芙蓉無端坐憶從前

事寂寂更深蒲院風

子夜憐歌一惘然江城何事月初圓春風絲管無窮  
恨屈指于今十二年

七夕

卿雲高卷絳河溥此夕長懸萬戶陰倚榻瑤淵如昨  
日九秋環珮碧天深

離愁別思秋風畔清夢仍留桂樹陰彈指不知雲路  
隔他生應恨此生深

風露淒清夜景秋蔚藍天上水空流阿誰拾得支機  
石拋向波心總是愁

霓裳雲袂月華秋湛湛銀河不盡流孤負此生還曾  
惜九霄靈駕迥生愁

深心窈窕幾逢秋萬恨無情天漢流那堪更是今宵  
永添得當年一段愁

采蓮曲四首

樹頭樹底光於露一片斜陽流水間隔岸采蓮歸少

婦滿船香載翠雲還

靚粧女伴輕橈去一水分歌小艷詞萬朵紅蕖照雲  
髻芳非無奈晚歸時

鴛鴦波上幽如霧翡翠灣頭月似霜多少新蓮與新  
思新聲一半是清商

水綠天青花欲然別裁芳調冠當年翠翹羅袂雙蘭  
漿唱到蓮心自可憐

憶揚州

江天抱城隔韻鵬淮橋入回圖二十四橋  
綠楊花開滿舊江都

虹橋窈窕鎖淮流估客帆檣半楚謳雲髻尚餘宮樣  
巧瓊花不似昔時秋

龍舟宛轉風流在蕭寺荒涼客夢餘聽徹玉簫何處  
所清淮明月映窻疏

淮山如黛水如煙江日潮生片月懸往氣卽今勞指  
顧海陵回首憶三山

送友之京

薊門西去路漫漫萬轉雲山醉裏看燕  
卽今誰解飲荆卿歌後酒應殘

大帆影裏卽京師極目滄江春樹移欲駕青牛  
同北去關門紫氣畏人知

除夕

春回江上梅花二月臘破洲西芳草風閒倚空樓獨惆  
悵一年忽盡酒尊中

元日

多情練洒平生事祇自尋流與看山今日又逢春色  
至一庭梅蕊亞闌干

垂柳

垂柳鶯黃絕可憐風風雨雨釀春天西鄰酒熟頻相  
醉鸚鵡杯中昨少年

夢迴

蕭然一榻夢遲遲夢覺還同入夢時新月一鉤穿檻



入泠泠流水泛空幃

多病

少年多病衰年甚長日惟翻種藥書轉眼春風俄二月一簾紅杏撲窗疏

秋日有懷余同麓先生往醉余公湖樓公勸危  
日相逢不飲空歸去洞口桃花也笑人茫然  
今幾秋矣爲賦一絕

風流相國今安在蕭鼓東湖憶舊遊洞口桃花搖落

盡畫樓珠箔幾逢秋

不寐

寶鴨香銷罽燼殘羅衾夢斷思滂滂怪來半夜天還  
曙聽徹秋風曉角寒

懷余皓泉

楚雲湘水思何如十載王孫萬里餘已恨衡陽無過  
雁更堪長斷越江魚

飲田叔舅所夜歸有踏歌緩步後隨如送出城

者漫賦一絕

六街如畫月亭亭小隊清歌逐後行  
水色山光秋扇底  
漫勞相送出江城

紀夢

春城花樹競翻翻  
淑氣林霏溢大川  
容與扁舟閒入夢  
瑤樓高倚次寥天

睡覺漫興未了有懷賓父伯翼諸君

天空風細夜何其  
睡覺閒庭獨步時  
徒倚闌干對明月  
滿堦紅藥露華滋

雲開寂寂曙光寒  
湛湛江流青黛山  
覺後大千同一瞬  
任教雙鬢二毛班

詩情酒興每徜徉  
七十從人笑楚狂  
萬事浮生心漸嬾  
時凭小閣賦滄浪

雲白山青水縠紋  
十洲仙境合中分  
風流回首竟誰在  
月滿空樓獨舉樽

秋日有懷已故諸公

余同翁

相國高懷曠世情  
回樓飛榭憶頻登  
長江寂寂孤墳  
綠萬樹秋風似雨聲

張沙翁

平生太傅相看意  
投老酬知愧未能  
今日又經聞笛  
地山池松桂石岐嶒

張台明

翩翩丰度信陵才  
五馬頻煩問字回  
心事卽今遺墨  
在白頭雙淚爲君揮

李賓父

平生古道如君少  
身後空增我輩哀  
寂寂孤墳隣曠  
野鴉啼上月侵堦

楊伯翼

子雲玄就身何在  
一代才名世所知  
竹徑桐扉猶昨  
日空簾飛盡野鳥低

不肖建世受

屢朝知遇止貽清白二字而表棄  
單寒至王父中衰才刃起于骨  
肉先君甫弱冠以一身支柱其  
間日事解排夜手一卷每至五  
鼓乃釋難稍平年三十始娶先

慈舉不肖不肖方五六歲爲摩  
頂曰吾二十年從乃林火井中  
不忝俯仰祇爲豐氏宗祊計功  
名長物非吾志得爾以筭申托  
之吾偕陶杜兩先生尚年終身  
止矣不肖亦知侍養唯謹往往  
脩桐踈竹之下一觴一盞旁立  
受訓而吉甫叔氏少先君十歲  
先君爲授室授餐不難割已所  
有佐之而自處于賈怡如也每  
遣不肖邀過同飲時時口授詩  
法今鳴臯集其一班矣經年杜

門郊園散髮長吟偶一二親知  
過從至無從覓巾襪而尤不喜  
交輦上人伸毫廢和如同志張  
范兩司馬余文敏同麓及屠田  
叔余僧杲楊伯翼沈嘉則李賓  
父數先生外指不多屈居嘗與  
到卽索筆直書破窻頽垣皆滿  
不肖兄弟竊抄記之然風雨脉  
望已去什之七矣憶不肖已未  
下第歸先君病且亟呼至篋邊  
曰吾平生爲人無它此去頗覺  
砉然獨先祠爲豪有力所據念

終不灰汝曹勉之至於吾詩文  
行否不足計也嗚呼人生數奇  
窮止矣窮而遺骨肉之難難而  
歷二十年之久摧殘坎壈神魄  
俱析而先君凜然以名義自豎  
以砥柱自荷以行吟命酒自解  
脫讀其詩知其人不肖亦何敢  
汶汶處此鹿鹿河曹差不點清  
白而以其勺餘值之梓嗚呼先  
君生于

世廟壬寅之王正朔日半坐從  
顛沛申出故字與諱皆所自道

也又自號天放野人屢諍于狀  
天啓丁卯秋初不肖男建謹識



米五百萬餘石  
五百萬石  
五百萬石  
五百萬石

米五百萬石  
五百萬石  
五百萬石  
五百萬石

米五百萬石  
五百萬石  
五百萬石  
五百萬石

米五百萬石  
五百萬石  
五百萬石  
五百萬石

米五百萬石  
五百萬石  
五百萬石  
五百萬石



